

Na osnovu člana 16. Zakona o upravi („Službeni glasnik Bosne i Hercegovine“, broj 32/02 i 102/09), članova 48. alineja 1) Okvirnog zakona o visokom obrazovanju u BiH („Službeni glasnik Bosne i Hercegovine“, broj 59/07 i 59/09), u vezi sa članom 1. i 3. Odluke o usvajanju dokumenata potrebnih za dalju implementaciju Bolonjskog procesa u BiH ("Službeni glasnik BiH", broj 13/08) i člana 12. Statuta Agencije za razvoj visokog obrazovanja i osiguranje kvaliteta („Službeni glasnik Bosne i Hercegovine“, broj 86/09), direktor Agencije za razvoj visokog obrazovanja i osiguranje kvaliteta uz saglasnost Upravnog odbora Agencije sa __ sjednice održane u Banjaluci, __.__.2015. godine, donosi

ODLUKU
O IZMJENAMA I DOPUNAMA ODLUKE O KRITERIJIMA ZA AKREDITACIJU
VISOKOŠKOLSKIH USTANOVA U BOSNI I HERCEGOVINI

Član 1.

U Odluci o kriterijima za akreditaciju visokoškolskih ustanova u Bosni i Hercegovini („Službeni glasnik BiH“, broj 75/10 i 44/13) član 2. mijenja se i glasi:

Kriteriji za akreditaciju visokoškolskih ustanova u Bosni i Hercegovini su:

a) strategija visokoškolske ustanove

- 1) visokoškolska ustanova definiše svoju viziju i misiju kojima djelotvorno vodi svoje aktivnosti. Vizija i misija su izrađene i revidirane u konsultacijama sa relevantnim zainteresovanim stranama i javno su dostupne,
- 2) visokoškolska ustanova ima djelotvoran sistem i procedure za provođenje, praćenje i dalji razvoj svoje strategije i akcionih planova. Visokoškolska ustanova izrađuje i redovno revidira svoju strategiju, u konsultacijama sa svim relevantnim zainteresovanim stranama. Strategija se formalno usvaja i javno je dostupna. Ona se odnosi na nastavni proces, istraživački rad/razvoj umjetnosti i doprinos razvoju društva, uključujući konkretne i ostvarive strateške ciljeve i aktivnosti visokoškolske ustanove,

b) unutrašnje obezbjeđivanje kvaliteta i razvoj kvaliteta

- 1) visokoškolska ustanova ima formalno definisanu i javno dostupnu politiku i procedure za unutrašnje obezbjeđivanje kvaliteta, koje obuhvataju i jasne odgovornosti. Te procedure su u skladu sa strategijom visokoškolske ustanove,
- 2) unutrašnje obezbjeđivanje kvaliteta koristi mišljenja unutrašnjih i spoljašnjih zainteresovanih strana, te podatke iz informacionih i sistema za praćenje i evaluacije,
- 3) sistem unutrašnjeg obezbjeđivanja kvaliteta je usmjeren ka stalnom unapređenju visokoškolske ustanove i pruža podršku poboljšanju nastavnog procesa, istraživačkog rada/razvoja umjetnosti, doprinosu razvoju društva i upravljačkim i administrativnim procesima,

c) obezbjeđivanje kvaliteta studijskih programa

- 1) visokoškolska ustanova ima uspostavljene procedure za kreiranje i usvajanje studijskih programa koje su u skladu sa strategijom visokoškolske ustanove,

- 2) visokoškolska ustanova ima uspostavljene procedure kojima osigurava da su planirani ishodi učenja i korišćenje sistema kredita izraženih kroz ECTS bodove u skladu sa važećim kvalifikacionim okvirom, da se primjenjuju na sve studijske programe, te da su predviđene prilike za sticanja znanja i vještina van ustanove,
- 3) visokoškolska ustanova redovno prati i dalje razvija svoje studijske programe, uz angažman zainteresovanih strana,

d) studenti

- 1) visokoškolska ustanova primjenjuje procedure kojima se garantuje pravičan, transparentan i dosljedan način ocjenjivanja studenata i kojima se predviđa mogućnost žalbi studenata. Procedure su formalizovane i javno su dostupne,
- 2) visokoškolska ustanova ima uspostavljen sistem za priznavanje kvalifikacija i perioda studiranja u skladu sa Lisabonskom konvencijom o priznavanju kvalifikacija, te prethodnog učenja,
- 3) visokoškolska ustanova obezbjeđuje adekvatne uslove i pruža podršku akademskom napredovanju studenata, osiguravajući jednake mogućnosti,
- 4) visokoškolska ustanova podstiče aktivan angažman studenata u procesima upravljanja,
- 5) visokoškolska ustanova pravovremeno studentima obezbjeđuje potvrdu/uvjerenje o diplomiranju, uključujući dodatak diplomi,

e) ljudski resursi

- 1) visokoškolska ustanova zapošljava dovoljan broj akademskog, administrativnog i pomoćnog osoblja,
- 2) visokoškolska ustanova priprema plan zapošljavanja i planiranje razvoja karijere, u skladu sa analizom koja se redovno provodi,
- 3) visokoškolska ustanova primjenjuje pravične i transparentne procese i procedure kod zapošljavanja i unapređenja zaposlenih. Procedure su utvrđene unaprijed, javno su dostupne i usklađene su sa važećim zakonskim propisima. Članovi u sastavu komisije za izbor u zvanje akademskog osoblja su kompetentni u datoj naučnoj/umjetničkoj oblasti (poljima i granama) u kojoj kandidat traži izbor u zvanje,
- 4) visokoškolska ustanova pruža prilike za profesionalni razvoj svih svojih zaposlenih, te ih podstiče da te prilike iskoriste,
- 5) visokoškolska ustanova akademskom osoblju pruža adekvatne uslove za aktivan angažman u oblasti istraživačkog rada,

f) infrastruktura

- 1) visokoškolska ustanova ima dovoljno resursa (učionice, laboratorije i laboratorijske opreme, računari, pojedinačni i grupni prostori za učenje, itd.) i uslova za kompletno osoblje i sve studente,
- 2) visokoškolska ustanova ima biblioteku opremljenu adekvatnim brojem bibliotečkih resursa u štampanom i elektronskom obliku i odgovarajući prostor i opremu za korišćenje bibliotečkih usluga i za akademsko osoblje i za studente,
- 3) visokoškolska ustanova sistematski i djelotvorno planira, koristi i provjerava svoje resurse, u skladu sa strateškim planom,

g) upravljanje informacijama

- 1) visokoškolska ustanova koristi informacione sisteme u cilju prikupljanja, analiziranja i korišćenja informacija radi djelotvornosti i unapređenja nastavnog procesa, istraživačkog rada/razvoja umjetnosti, doprinosa razvoju društva, upravljačkih i administrativnih djelatnosti,
- 2) visokoškolska ustanova redovno prikuplja i analizira podatke o napredovanju studenata kroz studije, stopi uspješnosti i napuštanja studija, omjeru studenata i nastavnog osoblja, itd,
- 3) visokoškolska ustanova redovno prikuplja i analizira podatke o radu, starosnoj strukturi i kvalifikacijama akademskog osoblja, uključujući omjer vlastitog i gostujućeg osoblja,

h) informisanje javnosti

- 1) visokoškolska ustanova na svojoj internetskoj stranici objavljuje relevantne informacije o svojim aktivnostima, uključujući informacije o studijskim programima i zvanjima koje nudi, a koje su jasne, tačne, objektivne, aktuelne i lako dostupne. Informacije se objavljuju na jednom od službenih jezika u Bosni i Hercegovini i na engleskom jeziku,
- 2) visokoškolska ustanova na svojoj internetskoj stranici pruža informacije o djelatnostima u oblasti istraživačkog rada i informacije o radu svog akademskog osoblja (publikacije, projekti, konferencije, itd),
- 3) visokoškolska ustanova osigurava sistematsku komunikaciju sa spoljašnjim zainteresovanim stranama,

i) međunarodni aspekti rada (internacionalizacija)

- 1) visokoškolska ustanova ima strategiju za međunarodne aspekte rada koja je usklađena sa strategijom ustanove i u kojoj je dat pregled njenih međunarodnih aktivnosti kao što su međunarodni projekti, bilateralni sporazumi, zajednički programi, itd,
- 2) visokoškolska ustanova ima adekvatne procedure i resurse za provođenje svoje strategije za međunarodne aspekte rada,
- 3) visokoškolska ustanova podstiče i osigurava međunarodnu mobilnost studenata i zaposlenih, te rukovodi sistemom za širenje njihovih iskustava i primjera dobre prakse.

Član 2.

U članu 4. stav (1) mijenja se i glasi:

„ Kriteriji za akreditaciju visokoškolskih ustanova objavljeni u ovoj Odluci primjenjuju se u postupcima akreditacije visokoškolskih ustanova (institucionalna akreditacija), a kriteriji za akreditaciju studijskih programa primjenjuju se u postupcima akreditacije studijskih programa I i II ciklusa studija (programska akreditacija).“

Član 3.

Ova Odluka stupa na snagu danom donošenja, a primjenjuje se od 01.10.2015.godine i objavljuje se u Službenom glasniku Bosne i Hercegovine.

Broj:
Datum:

Direktor

Doc. dr Husein Nanić

O B R A Z L O Ž E N J E

I - PRAVNI OSNOV ZA DONOŠENJE ODLUKE O IZMJENAMA I DOPUNAMA ODLUKE O KRITERIJIMA ZA AKREDITACIJU VISOKOŠKOLSKIH USTANOVA U BOSNI I HERCEGOVINI

Pravni osnov za donošenje Odluke sadržan je u odredbi člana 48. alineja 1) Okvirnog zakona o visokom obrazovanju u Bosni i Hercegovini („Službeni glasnik Bosne i Hercegovine“ broj 59/07 i 59/09), kao i člana 1. i 3. Odluke o usvajanju dokumenata potrebnih za dalju implementaciju Bolonjskog procesa u BiH ("Službeni glasnik BiH", broj 13/08). Pored toga, članom 7. i članom 12. Statuta Agencije za razvoj visokog obrazovanja i osiguranje kvaliteta („Službeni glasnik Bosne i Hercegovine“, broj 86/09), propisano je da Agencija donosi propise iz svoje nadležnosti uz saglasnost Upravnog odbora Agencije.

II - RAZLOZI ZA DONOŠENJE PROPISA I OBRAZLOŽENJE PREDLOŽENOG RJEŠENJA

Razlozi za donošenje Odluke o izmjenama i dopunama odluke o kriterijima za akreditaciju visokoškolskih ustanova u Bosni i Hercegovini („Službeni glasnik Bosne i Hercegovine“, broj 75/10 i 44/13), temelji se na potrebi i namjeri konsolidacije i poboljšavanja postojećih kriterija za akreditaciju visokoškolskih ustanova na osnovu prethodnih iskustava i povratnih informacija dobivenih u vezi sa aktivnostima na eksternom osiguranju kvaliteta u Bosni i Hercegovini. Namjera je i pravljenje što preciznije razlike između kriterija za licenciranje, kao minimuma koji mora da zadovolji visokoškolska ustanova kako bi počela sa obavljanjem djelatnosti i izvođenjem nastave i kriterija za akreditaciju koji teže unaprjeđenju svih procesa na visokoškolskoj ustanovi.

Također, cilj izmjena i dopuna je eliminiranje preklapanja i ponavljanja elemenata postojećih kriterija, te njihovo usaglašavanje sa Revidiranim standardima i smjernicama za osiguranje kvaliteta u Europskom prostoru visokog obrazovanja (ESG), a koji će biti usvojeni u maju 2015.godine na konferenciji europskih ministara odgovornih za oblast visokog obrazovanja. Namjera je i da se na najbolji način prenesu međunarodni trendovi u osiguranju kvaliteta.

U članu 3. predloženo je da Odluka stupa na snagu danom donošenja i da se objavljuje u „Službenom glasniku Bosne i Hercegovine“, a da se kriteriji primjenjuju od 1.oktobra 2015.godine. Visokoškolske ustanove mogu da podnesu zahtjev za akreditaciju nadležnim obrazovnim vlastima prema važećim kriterijumima do 30.septembra 2015.godine.

V - FINANSIJSKA SREDSTVA

Za sprovođenje Odluke o izmjenama i dopunama odluke o kriterijima za akreditaciju visokoškolskih ustanova u Bosni i Hercegovini nisu potrebna dodatna finansijska sredstva.

VI - PREISPITIVANJE ODLUKE

Preispitivanju Odluke pristupit će se u zavisnosti od njene primjene u praksi i ukazane potrebe za izmjenama i dopunama.